

四庫全書

集部

欽定四庫全書

集部

元詩選初集二十八

詳校官中書臣王鵬

主事銜臣徐以坤覆勘

總校官編修臣王燕緒

校對官檢討臣溫常綬

謄錄監生臣周本忠

欽定四庫全書

元詩選初集卷二十八

庶吉士顧嗣立編

范經歷梈

梈字亨父一字德機臨江清江人家貧早孤刻

苦為文章人罕知者年三十六辭家北遊賣卜

燕市薦為左衛教授遷翰林院編修官出為嶺

海廉訪司照磨歷轉江西湖東選充翰林應奉

改閩海道知事移疾歸徙家新喻百丈山天歷

二年授湖南嶺北廉訪經歷親老不赴其明年  
以母喪哀毀卒年五十九德機癯然清寒若不  
勝衣而持身廉正為文雄健追慕先漢古詩尤  
好為歌行工近體藹然見忠臣孝子之情焉吳  
丈正嘗以東漢諸君子擬之稱丈白先生所著  
有燕然藁東方藁海康藁豫章藁侯官藁江夏  
藁百丈藁總十二卷揭曼碩序之以為虞伯生  
稱德機如唐臨晉帖則終未逼真改評之曰范

德機詩如秋空行雲晴雷捲雨縱橫變化出入  
無朕又如空山道者辟穀學仙瘦骨峻嶒神氣  
自若人如豪鷹掠野獨鶴叫羣四顧無人一碧  
萬里差可彷彿耳德機詩學廬陵楊中伯允得  
其骨郡人傳若金與礪得其神皆有盛名於時  
歐陽原功曰宋東都時黃太史號江西詩派南  
渡後楊廷秀好為新體宋末劉會孟出於廬陵  
而詩又一變我元祐以來彌文日盛京師諸名

公一去宋金季世之弊而趨於雅正於是西江之士亦各棄其舊習焉蓋以德機與曼碩為之倡也

送張鍊師歸武當山

張君瀛洲人來作武當客始來武當時祇著謝公屐弟子百數輩稍稍來服役誅茅立萬柱空中現金碧辛苦三十年夜卧不側席以之律鬼神故亦如短墨元年踰冬旱失火燒四國野谷方焦燉六月畿甸赤朝廷亦不

愛犧牲與圭璧僵巫暨僊史歌舞無消息君時待詔來  
公卿初不識一朝傳天語問以濟旱策君云臣鄙愚造  
化非所測陰陽有開閉此實智者責公卿復致辭物生  
今孔棘已勅京兆尹取足輸粟帛此如解倒懸祀事惟  
所擇君聞猶固讓心實內憂惕飛章白玉闕瀝膽殫悃  
幅臣實才淺渺臣實學迂塞臣有一寸心願輔后皇德  
后皇本愛民民今旱為厄或者罪有由皇亦重開釋祈  
謝各有方呪禁各有式上堂薦明水下堂考金石夜分

請命既昧爽大施設為壇東市門經紀法靈冊庭中玄

武旗飄飄墨黍

一作水

黑君臨一揮手怒髮上霄直指麾

東方龍卷水東海側指麾西方龍卷水略西極北南暨  
中央各以方率職某日某甲子漏下五十刻我在壇上  
伺不得忤區畫豐隆與飛廉列缺與霹靂汝將汝風馳  
汝遣汝雷擊汝雲馮勿漓汝雨必三尺汝不從誓言不  
畏上帝勅至期果響答動盪七日澤常時人所難君若  
不以力公卿奏天子是必有褒錫可以寵號名可以蕃



服謁君曰天子聖卿從誠所格臣敢貪天功況乃歸計  
迫昨得山中書至自青溪宅向來百弟子遲歸在朝夕  
嗽時冬序半霜下木葉積明當課斬伐結構西巖僻山  
田晚報熟芝朮及採摘獼猿長如人夜夜盜柿栗隄防  
苟不豫六氣盡蟲賊公家事既已私事容葉擲方知用  
世士遺世等糠粃所過如虛空焉知去留迹我持一瓢  
酒欲以贈遠色歲暮不見君悵望空中翮

奉同元學士以落月滿屋梁猶疑照顏色為韻賦

贈鄧提舉之官江浙一首

青天青如石星辰何磊落適見北斗高忽復滯郊郭感  
此流電驚行邁孰為樂況值杪秋令清商動涼幕芳燕  
候朋親驅車背河朔登高望四野下田畢新穫於時不  
同賞惆悵睇雲岳古人有云然末契重交託託契自有初  
相睇在結髮請持交龍鏡比似空際月昔月三五盈今  
夜三五缺月盈自有時俟君采薇薇采薇陟崇岡空筐  
不易滿季女懷朝饑日下光纂纂豈無機杼思十旬義

一漸含悽就經緯意長絲緒短路逢相識親要入鮫人  
館泣下仍成珠更苦哀歌緩緩歌浮雲停急歌流水促  
水流亦有宗雲散復成族踽踽行路子離居振羣肅會  
合寧無期載感時運速晨風懷苑林玄鳥辭華屋明發  
念飛蓬秋聲浙江曲浙河名山水在昔最餘抗浩浩負  
海區地絕川無梁執玉夸禹會帶甲宣吳疆慨彼仁義  
都風俗殊興亡末代綴繁會周衢沸絲簧聞之虛廟閔  
斷雨生蛩蛩幸及九域一四民

一作海

樂時康游歷須慎

重勿用多殞傷矧茲握新命出布堯文章雖當日月遠  
足昭雲漢光淒其金氣厲嘉實方斂藏楊柳卧枉浦蕭  
葭委嚴霜物情各有歸我獨不得將仰視雲中鴈肅肅  
俱南翔雲鴈明天中回首顧齊州沙嶼重綿互竟復少  
遲留欲知鳴鴈心黍稻非終謀視彼羣飛者失心良不  
猶不猶將謂何豈復不如茲明年擇聖蹈既往無復疑  
譬之騄蹄駒昂藏養雲姿下乘歲百駕逸足誠歸誰伯  
樂偶並世當受知者知長鳴待儔侶首路復安之所之

在東南斷水列風嶠至人遺吏隱出處惠兼妙千莫居  
匣中千年逸神耀一朝持入手未言心相照照之千里  
外如在咫尺間明夜夢見君始怡越河閨惜去不須臾  
念來亦循環古時岐路人何用涕潛潛景巖草木斷虎  
豹啼空山方冰先春水野飯維清灣買觴斲魚鮮甫謝  
金鑾班此行竟遂媾亦慰親友顏天目掃烟岫日夕飛  
禽還山中桂樹多庶為故人攀攀花貽遠道洵美道中  
輒若復無相忘報之雙白壁美人如芙蓉隔浦無相識

舊交日已違新交當日得各自有殷勤初不在容色俯  
水愧遊鱗仰空慚飛翼眷言執手地歲暮霜霰迫踟躕  
復踟躕悽惻重悽惻

貽富珠哩卹編脩

悲風動日夜游子絕河山一別十年流四方幾時還憶  
子旅江外過余撫林藹曉色竹晻霏春容杏闌珊陽坡  
鳴赤雞陰館來白鷗文義相剖析宴歌亦循環吳星逐  
夢變楚月帶愁纒芳自來燕薊中相望溪沔間初傳教下

郡或道釣清灣起居雖未悉聲聞已難攀明聖御八極  
震驚折羣姦登賢彌制斷進士嚴刊刪倒澤起游泳搜  
空集翻翽斯時麟見郊絕世驥在閑豈期脫布衣復得  
聯朝班始疑迹異方卒見意俱閒惟此冰雪壺近當雲  
霧關紀載竹帛藏潤色絲綸頒儲才藏地闕抽思刮天  
慳固當讓俊逸焉得委疎頑物化豈堪玩仙栖庶可扳  
寤寐在靈嶽徬徨愧塵寰碧草蒙澗吐青霞冠雲鬢長  
生願不負竟往事無艱常聞羽人言頗落俗士顏早伐

九節杖倚之聽潺湲

桴蒙恩供奉翰林未行改佐閩幕自豐城便道取  
疾繇撫過盱與郡守薩侯會約尋麻源不果明

日別盱

暫遠雲霞觀却希山水音珠星聯極下壁月動江潯始  
集寶氣亭復趨金晶岑馬飲樹連澗猿啼風滿林揚瀾  
思汗漫睇嶺寫嶽嶺輟權更垂釣推書時弄琴石門生  
夕景麻源籠曉陰是郡遇賢守佳致契幽尋樽俎迫清



好絃歌彰古心郡中宜鳳集泓下或龍吟頗愧塵務偏  
還為旅病侵一行混吏軌千載負國琛即往事莫究於  
茲念方深姑山如有意遂許一登臨

由海昏入武寧道中

登高勢欲墜踰險心始領戒想適其恒經過何由騁洩  
雲行崦杉零露浥澗茗玄蟬振山淒白鷺團沙整久盼  
歸年近沉懷垂釣永豈不畏嚴程無因攬流景烟霞蘊  
至樂歲月啓深省百丈有幽期眷茲心耿耿

九日報熊敬輿

羸疾卧江滸承恩慰高秋木落隴階淨天朗氣暄柔便  
了晨光中授我雙螯蚌呼童敬薦之風味宜南州憶昔  
客燕薊白雲從方舟於時見此物千錢三十頭打黃試  
新羹爛醉天市樓一日食一百更為明旦謀三日困暴  
下傳笑諸公侯此邦誠罕見初出一作市愈難求矧當浮  
冀日傾道俗如流厚價得兩螯持之比琳瑯物有少為  
貴感事重綢繆奈何雷同者正復多優游欲折黃金花

報君向滄洲此花苦未發少待歲寒酬

贈安西王提舉別

車聲何軋軋去我亦翩翩借問車中人幾時到秦川秦  
疆數千里西與雲棧連行人秣馬過猿啼上青天長安  
古帝州宅土腴不偏聞君答平昔宦游祗晏眠十齡涉  
文史十五懷家擅二十學壯游五十綴朝聯奉常老掌  
故今已二十年功業晚何就蕭蕭髮垂肩天子念逢掖  
錫官頗靜便紫衣綰黑綬此是車中綠飄飄上都門白

馬錦連乾舉案招青山孟光老猶賢大兒坐車軒小兒  
調馬鞭中兒又絕好國語荷珠圓旦夕俟君至買舍清  
渭壩此皆足慰意日食官俸錢俸錢足養親親自有主  
田人生慕富貴富貴翻受憐不有鐘鼎食亦無膏火煎  
前日三市事目擊心凜然當時氣凌人不得呵烏鳶觀  
君浩蕩去萬事當棄捐孔子不西行及河軌再旋今君  
涉河流西路方縣縣終南與嵩華是中多神仙掌出  
浮雲上有三峰蓮真人玉拄杖挂在明月弦便當徃從

之吸月升太玄金鼎交龍虎使我神貌堅奈何二三月  
百憂集離筵空花如錦機野色相交鮮楊花亂愁思萬  
條散青烟我不酌美酒敬讓故人先搥碎琥珀盃獨灑  
春風前春風澹無言徒以別慮牽別亦無所慮所慮應  
當宣願及相思時中腸鬱糾纏為吹雙紫燕銜書到君  
邊矯矯蕭徵君珠貝藏龍淵一別如列星隨天夜移躔  
鳳有五色瑞時下岐山巔請君問起居歸來定何年

宿夏莊

陰晴知何如開戶月滿地主家種長榆竟夕薰風至半  
生朝市蹤頗負山林意及茲登覽餘亦復纏世界疎籬  
臨大道嘶馬駭童稚衆卧復離披躊躇獨無寐江山轉  
寥落星斗亦聯綴丈夫十載間豈獨鉛槧事

贈方永叔往教重慶路

汲水得明月倒影上青太客行三十年未識蜀月圓中  
宵夢已蜀秣馬辭燕服成都雖云遠未到意已足遠意  
不可期宿夕宛見之雲迷飛鳥道雨急卧龍祠干戈何

草草祇說渝州好，但得渝州官甘就。渝州老渝州古雄，  
城彭君舊建旌，至今江石上猶有古時名豪傑。世已矣，  
空城俯流水，復有江東人來教渝州士。方侯天機深大，  
雅託遺音沈潛萬夫敵。脫略五湖心，翩然別我往。長揖  
仙人掌，疾風吹大旗。落日明斜舫，即此少相知。相知長  
恨思巫山，桂樹發折寄。定何時？

送吳真人持詔寧親

垂楊十二門，旦旦羅鳴騶。千騎萬騎中，孰是違世儔。美

哉吳夫子脫灑住丹丘氣涵羣象動思與萬物周天馬  
出名駒逸態橫九州自從下地走但飲星河流明月落  
中江倒影射斗牛飄然持玉節去犯蒼山稠紫鳳把細  
華逶迤仙巖蹶遂經三茅岑已登閣峰頭還家拜封君  
玉冊珊瑚鉤笑問遊子衣不獨五色優門縣朱雀旌坐  
擁金明裘開筵浥芳醴魚觴進庶羞承顏開淑訓慰爾  
道路修爾歸奉天子萬歲更千秋番君大國壽賀老清  
湖愁烟水三萬頃宮袍在扁舟荷花合古渡此處不夷



猶雲錦雙鴛鴦悠悠戲汀洲東風長年來揚我闌檻幽  
白馬絡金羈奈此甚盛休儂家閣峰下霞竹數稻疇鶴  
集偃松雪青雲互綢繆自從干戈餘川岳蕭騷秋骨肉  
何四海風雲擾吟謳聞君復此去浩蕩懷今遊罷酒黃  
鸝鳴高花艷城樓良辰難能別嘉會易為酬至樂夫子  
行子行無滯留

散步還南軒

幸自塵鞅絕起游欲何之江遠夕氣澄開軒納新詩莎

雞振陽砌蟪蛄結陰池  
珊珊修木靜宛宛好風遲

一作馳

桃杏競秋園旋隨時草萎寧不悅  
生植肅殺乃其宜于斯見發育及深  
霜露思嵇康本達節竟受薄俗嗤快哉  
東方生嘲唵得吾師

度澤過關山

單車度大澤有似游梁山  
初飛鴈驚徒辱在葭葦間  
季冬陰風盛雨霰紛紛  
珊珊念我離大府行役何時還  
朝臨昌邑浦夕指番陽灣  
衝泥赴農邨老屋夜不關  
然薪設

供帳風味猶百蠻蒸烘濕衣裳徒御相迴環極知道路  
難猶念奔走艱傳餐逮明燭饑渴未容慳春和理稅駕  
且以慰哀顏

古干將

爰爰古干將經世不再見豐城匣已空龍亦久當變百  
怪日夜出思爾一斷剗裝佩美紛紛不爾真百鍊又恐  
百怪飛反著他人身麒麟或失所魍魎氣益神不如且  
深藏慎勿干星辰我歌干將行庶為君子陳

和荅楊茂才

始我南山居與子共朝夕服事子尊君德義鵠風昔馬  
知二十載萬變如頃刻漁釣負平生浩蕩隨所適進慚  
負官義退愧尋幽迹而此山水間時勤問消息夜深款  
巖扃蘿月在屋翼清言溢前聞子學日有力世好將未  
忘相資庶有得

二杏

甲寅

北鄰杏一株身作龍盤擎直上青天中虛空高結花南

鄰杏更好枝幹相交加三月二月時市地堆紅霞自我  
來京城寄居諸公家其地僻且阻茂樹繞窗紗亦有桃  
與李盛節爭豪奢雖富無可人紛紛亂如麻晚遇此二  
杏突兀超塵沙常時好客來立旆遙咨嗟欲去復顧戀  
徃徃至日斜我昔值詞館羸馬道路賒晨徃昏黑歸無  
由領其嘉今我已投散終日猶枯查朝暮出見之百市  
虛簷牙而我又將去何繇報繁葩誓將適南郡辟地江  
之涯種此一萬樹漫漫被荒遐花成實給食收拾歲盈

車此事亦易集但恐君疑誇

谷口散暑

谷口月未上漁火出橫塘門前面稻畦  
黿鼉雜風篁童  
卯弄山墅今茲白髮長新歸稍結構日  
俟江海涼琴書  
散衡宇藥物布滿牀謝告未緣衰以疾  
不得將維時仲  
夏半織女當西堂常恐梧樹落莎雞戒  
衣裳平生荷耒  
志經歲失豐穰此行庶無負海內膺時康

登石城驛亭

南游未是謫北行不當歸今旦陟崇岡飄飄風吹衣始  
我在京時雙闕凝秋暉別來守窮海故國音書稀竊祿  
滋愧負何時覩柴扉胡不依白日去即能如飛驛樓俯  
平川其下白雲圍雨餘足稻粱可以信豐饑去去道路  
遠王事毋稽違

饒國吳氏晚香堂

大江秋似練楚樹落清曉巖際不逢人翩翩數歸鳥饒  
君庭宇靜澗水黃花繞爛錦照天朗繁錢承露小何當

鷓鴣鳴誤識春事了馬知歲寒姿獨立西風表乾坤有  
清氣欲缺未易少搖落暮春期美人烟霧杳

適將赴江湘大府校進士試會疾止建安驛上後

山東眺郡城作十二韻

青雲建安郡人物故鍾秀承旭開芳樹凌虛列遙岫溪  
聲涌夜長石角吐秋瘦漁沙府圖識仙室川浸溜征塵  
汨炎毒服事彌奔奏淡淡鴻鵠舉蒼蒼鷹隼候山英茗  
在淪館飯菰登豆勤渠相國誼忝竊大夫後顧惟論賢



能奚取推寡陋吾欲救五丁雷電激宇宙疾飛移萬壑  
及此洗昏疚起為梅子真南厓埽丹白

八月十五日公堂讌別作

悠悠我行邁去此粵山端遲明駐征車爰盡公堂歡開  
顏俯城郭簫鼓集儀鸞謂欲戒醉飲重此良辰難關門  
集會府僚友並征鞍更辭無別語但祝長加餐役者四  
五人相從出林巒亦復路旁泣豈獨殊肺肝況我離慈  
母朝暮偵平安送行各如許焉得不辛酸

秋日海康齋居

吟事久已落茲晨遇高秋泠泠空中籟襲我書帷幽如  
何寒暑疾徑與大江流江流不復轉歲月已還周遊子  
去京華邈在天盡頭胡鴈不踰嶺眷眷非良謀排雲挹  
飛觀金爵露光浮在遠心所仰胡為滯滄洲茅屋足花  
草洵美難久留苟能一吾志斯道將何憂

曉出西郊

自春已及夏歲籥寢中更平旦西郊道始聞啼鳥聲川

晴樹氣嘉夕露枝條盈西峰近在眼白雲夾路生一從  
違風昔好懷鬱難并未知高世意忽復何以營屠狗與  
漁釣俱足成大名卓哉箕穎客使我抱深誠

登西山頂還方澗作

弱質有貞向依依在物表謬當城闕隘放意窮昏曉晨  
興理良轡啟途慮已悄白日滿澗阿林虛答鳴鳥幽尋  
晚適遇頗覺知者擾俯仰古人迹達生未為少緬彼高  
翔禽凌空自騫矯

秋江釣月

秋江明似鏡，月色靜更好。之子罷琴來，蘿徑初尚早。  
衆峰更滅沒，橫笛隔幽島。我船爾棹歌，絲綸蕩浮藻。  
潛魚却寒餌，宿鴈起夜縞。離離不可招，白露下烟草。  
高風桐廬士，俊業渭川老。同是釣魚人，那應不同道。  
把酒酌清輝，如何答穹昊。

郡中即事十二韻

儋耳九州外，邈然在南荒。周回數千里，大海以為疆。  
古

來非人居禽獸相伏藏自從中世來貢賦登明堂其或  
失撫馭山藪更陸梁聚則成蜂螳散即驅牛羊高結舞  
大鹵上衣不備裳殺戮乃酬勸誅之仁者傷吾嘗七八  
月持節泛滄浪一旬錄郡獄詢事考纖芒問之守郡人  
莫識為治方但見西風多廨宇秋蕪長聖哲戒忠信勿  
謂不足行及茲蠻貊邦始見斯道臧

清江楊暈云文白  
先生詩性情所宗

一以少陵為歸海外  
諸作杜之悲壯也

### 出甘蔗州

清雨氣候變移船孤石灘已行千里餘始驗初冬寒暫  
解霧露毒稍知江山寬新人異言語故事同憂歡思昔  
夏后氏封建天南端伯業起句踐世遠子孫殫無諸佐  
大業遂作漢王官身受閩君策白日海澄瀾至今崇臺  
上列戟絢衣冠古來樹名節於此事常難惟有精英在  
青霄明羽翰

晚登南樓眺烏石九仙方山諸峰

自來閩中郡僑寓公宇偏身病瘵服餌單居日如年憲

署歷三試愚庸寡所宣茲行臨辟道黽勉以周旋日夕  
登高臺遙盼四山川山川亦云美宜與萬念捐慈幃隔  
江關穉子目娟娟連夜夢新堂嬉戲在我前祿食無寸  
補遠遊何當還東風號陰澤此土候氣先草木相裛榮  
已復爭碧鮮思及方春時買船向邵延長歌蕩暄景吹  
笛玉臺烟行止欽聖訓義著良象篇此豈不在人虛心  
以勉旃

四月八日訪閩粵王無諸古城遂至蓮花峰下僧

寺寺乃唐王審知祠

維夏氣清晏原藪樹龍蔥上弦適休暇游詠紫烟中石  
澗演新流山苗含惠風肥苧膚隱白崇榴葉張紅撫節  
警代謝未歸憂心忡承官眇政術但覺祿養豐勾稽因  
日月始得如游驄觀省職何補庶望禪至公遺丘隱莎  
草廢剝在空濛而況塵境事斯理固有終

數日毒熱喜雨適立秋先三日也

夏末始炎毒沈憂坐匡牀起行無所之登高睇遐荒問



昔西風歸飄飄向何方往還不可期  
賴得天道常聖主御大歷故可稽  
明堂粲粲白駱駝茲晨郊路長  
念我伏遷次江海葉再黃  
旅懷抱焦火思濯寒冰鄉  
忽來浮蒼雨爽氣吹我裳  
福田已就獲晚種待新秧  
微軀亦易持但願蒸黎康

新雨階除花藥倍茂  
田里生意懷之欣然情至有  
述簡諸作

久旱埃霧集閒居寡高情  
微雨夜來至滿庭花藥生長

年憂里術退坐若無營偶攜一榼酒得喚故人傾念彼  
忙隸便勞生在耦耕薦饑苟不熟何以供王程幸天沛  
時澤食息日已寧繕性衡門下饑寒無足驚

苦熱懷楚下

苦熱不可極念此西南風誰云灝氣遠乃在庭戶中我  
家百丈下井上雙梧桐向夕集歸鳥未秋足鳴蛩自從  
別家來江海信不通宛宛維桑思願從孤征鴻夜夢白  
髮親歡笑攜稚童倚門望子歸未歸憂忡忡東皋無良

田何以待歲豐盛年將稱意無為學轉蓬

明月幾回滿

明月幾回滿待君君未歸中庭步芳草蝴蝶上人衣誰  
念同袍者閒居與願違

蒼山感秋

蒼山秋意長池館靜而闕雨止修竹間流螢夜深至皇  
羲世云遠雅頌日凋弊舉手遏頽波誰識作者志烏啼  
魯東門泗水不染袂後去三十年直可肩聖知機關繫

風化詞語特細事月落閑虛簾坐夢太古帝揚眉顙王

色盡發養生秘勿謂仙學

一作學仙

難此道可立致

樂世奇草木子

云昔危太朴與德機同晚步德機得雨止二句喜甚既而曰語太幽殆顙鬼作

酬申屠子迪

碧月出海底挂在青天中美人如明珠滄波思無窮身  
非千歲蓬欲逐萬里風願因紈素衣託向孤征鴻

筠州東都遇雨

高林展夏綠杲日轉城岡四國金石流忽見飛雨涼飄

飄西北風亦復至我旁我行初涉旬去意已徬徨親交  
苦滯留川陸互一作誨阻長遠行雖有命期至詎能忘宵  
分睇南星命僕戒川航豈無他方願且及顧舊鄉舊鄉  
寧非懷吾生未渠央

秋江

秋生洲渚靜露下蒲荷晚忽憶釣魚時人家楚鄉遠  
絕句三首

障擁芙蓉競燈隨柳移繁星臨迴野疎雨過高池

江上打魚船有頭那無尾與卿相見時不望如魚水  
鄉路西州是延平那向東片帆儂會使祇是怕隨風

看東亭新筍

問竹何年有親曾共歲寒昨傳新筍發扶杖繞林看  
蘄州城下晚泊與土人語及西方事平有喜而  
作

野濶秋無際天空夕始涼漁船下浦急畚火入雲長洲  
遠懷鸚鵡山危指鳳凰戍人新斂甲垂老幸時康

黃州道中

徑轉山仍掩沙移圃自成葦葭連水白楊柳蔭門清無  
復論餘事真堪了此生眼中陳仲子九鼎一毫輕

百丈山中夜坐聞謹思將還憶甲寅入南中正此  
日也十二月二十三日四首

近得雷州信遙聞弟姪來江山淹遠望天地保疏材鄉  
為魚羹起今寧馬豆猜殘年有心事未定著

一作省定

寒灰

欲雪翻成雨何天恰吝情似緣春在近故與月爭明谷

樹行行暝川雲冉冉輕往年當此夕孤棹適南征  
斜谷驚風合空階墜溜鳴燈昏時作暈漏遠不傳更但  
得林間趣何須谷口名是誰超物外不用計浮生  
客行身萬里家在地中分爵命優臣子江湖遠聖君夜  
瞻龍鳳氣歲出虎狼羣舊故無消息低回瘴海雲

壬戌秋錄囚晚行寧州道中追錄

曉發高平鎮前旌路未分小橋烟外過流水月中聞虎  
豹宜多隱豺狼不可羣居人敵炎暑報有竹連雲



引兒灣晚泊

席壓波心正舟移岸脚斜  
夕陽明細霧秋樹擁荒葭  
問道獨如夢懷京却勝家  
客愁不自整更苦暮啼鴉

九日諸生攜酒至城東看菊

楚楚臨階菊重陽特地開  
慰人良有意報汝愧無才  
巷杵聞雞發鄰觴送蟹來  
采英吾欲寄悵望倚江臺

晚過孔奉常舍下

滄江一萬里書信近如何  
向暮客懷薄及秋鄉夢多  
故

人相慰藉並舍數經過但願長無事彤庭接珮珂

贈別李教授亭赴五羊先往餘饒覲省

行色動西風鄉心去住同諸生五嶺外之子大江東且  
羨還家鶴無愁度海鴻若逢天上使書記莫怱怱

王繼學晚過舍下翌日惠詩兩章用韻荅貺

錄一

平生病太史淺陋愧曹邦自足封函谷聊須壘受降黃  
鍾知和寡白璧動成雙天外誰招得清風滿八窗

和二章已而徵者適至戲用韻為再疊云

久客歲云暮悠悠念異邦  
病因詩暫愈愁為酒先降  
屋  
隱疎篁半城依老樹雙  
晨朝有好鳥命我隔東窗

登南城樓

樓倚晴空外登臨延賞心  
微風孤鴈過落日萬蟬吟  
客  
路侵齊樹鄉愁接楚砧  
為詢宮外筑流水似哀琴

寒食後百丈山夜坐

已新寒食火更近暮天鐘  
花片隨風減柴扉帶月重  
以  
閒  
酬  
宦  
達  
將  
病  
抵  
心  
慵  
本  
不  
從  
耕  
稼  
臨  
江  
愧  
老  
農

快閣延望

快閣延江望清尊息坐彈風雞猶戒曙雲鴈每辭寒莫  
使晨歌廢聊思飽食安百年會有故終不媿儒冠

題秋山圖

我愛秋景好自緣秋氣清江空石露骨木落風無聲偶  
向畫中見猶如雲外行祗疑豺與虎無地得縱橫

貴州

離思久不愜幽情晚旋添天宜明月獨山與宿雲兼

語通支柱蛛絲映卷簾若無光霽在何以破朱炎

發橫浦之永淳縣

急檣開晨漲孤尊已夕陽水光排峽靜洲勢背城長太  
史才無敵將軍義不忘感傷今歲月淹泊媿滄浪

題吳生雨吟圖還寄清江皮野

江雨四時昏故人家遠邨如何一見面還又兩忘言老  
樹經鮫淚空花斷鴈魂由來前日畫妙手出吳門

東齋秋雨後花藥具有生意

田園雖尚遠未肯效淒涼藥就籬成蔓花因徑作行豈  
惟延晚趣自足信年芳頗敬鄰人婦驅難不過牆

晚興

古寺山重掩平田縣對門鷓鴣藏白晝蟋蟀破黃昏貝  
賈多通市諳偷每近邨殷勤省風俗慷慨動心魂

晚上南山觀燒

渡口向寥闌夕暉生翠屏隨風初繞電翳霧忽如星鳥  
獸蒸宜遁柴扉照不扃閨都春始過雨洗合重青

京下思歸

黃落薊門秋飄飄在遠遊不眠聞戍鼓多病憶歸舟  
甘雨從昏過繁星達曙流鄉逢徐孺子萬口薄南州

期出東郊不果却率便河閘橋詣張道人菴尋故  
舊作

却欲東郊去還尋北渚來江翻垂木動風過雜花迴  
道迷朱轂虛空見紫臺世氛渾不奈憶得是蓬萊

和李漑之園居雜詠四首

書劔上青霄鄉關雨雪遙年華侵水竹客思墮山苗會  
想高巖綺將從鄭里橋文詞誠小伎祇比俗情饒

豈是幽棲地飛騰亦未量城根分鼠壤池面合魚梁名  
久喧郎署歌時感女桑畏卿音調苦疇復貴相忘

圃色依簾障天光切戶庭草生連夜雨花落徧池星未  
遂翔寥廓真堪托晦冥逢時須紫燕得意拂青萍

丹柰花初結朱櫻子半成寢興因物變筋力與年增燕  
拂承塵去蜂隨曳杖行玉泉幾千仞好在翠如傾



種瓠

或言種瓠蔓長必翦其標乃實予齋所種因樹  
為架蔓緣不已果多虛花欲去之慮傷其凌霄  
之意因賦五言為之解嘲云

豈是階庭物支離亦自奇  
凡草蔓綴得好花枝帶  
雨寧無實凌霄必有為  
啾啾羣鳥雀從汝踏多時

秋後瓠果成一實輪囷可愛  
余嘉其晚成而不

羣答賦云

嘉瓠吾所愛孤高更可人不虛種植意終繫發生神有  
葉誠藏用無容豈識真明年應見汝衆子亦輪囷

寄李彥謙御史

古燕城下路柳樹落西枝每到重來處長憐欲別時鵲  
飛平照急鷗集遠烟遲此去秦州什應須寄我知

盧師東谷懷城中諸友

契濶遽如許淹留室復情天遙一鶴上山合百蟲鳴異  
俗嗟何適冥棲得此生平居二三子今夜隔重城

離席合賦贈南劔教授盛復之之官

首路向朱夏出關猶到官  
麥收風漲暑梅熟雨留寒  
氣候隨方異才名自古難  
豈容賢若爾教授老江干

遣懷

柳影侵門暗桃枝亞竹高  
年深詩並進春在酒爭豪  
吏隱嗟何擇行藏信所遭  
斯文如未喪端合付吾曹

贈李提舉之官豫章

公孫閣下士多似魯諸生  
昨者聞高誼茲行起盛名  
文

亭南斗近征旆北風輕余亦懷鄉郡今猶滯帝城關河  
驚半面雪霰念孤征芳宴絲簧咽新詩錦繡成長途心  
果怯令節眼增明渺渺饑鷹度嗷嗷旅鵲鳴露凝秋浦  
白雲散夕堂清是物關流動何階計合并會須營桂楫  
相共吸尊羹徐孺亭前水因之幸寄聲

立春日和王翰林

北斗紅雲上西城皓雪邊歲華今若此宦味故依然節  
輜荒冬後寒驅夾日先樓臺通帝極井落散人烟登眺

臨無際歡娛信有年客情關外地農事庾陰田只有傷  
絃促那能效履穿幾時歸櫟社盡日接芳筵寶鼎昇平  
瑞金旂淡蕩妍逶迤朱鳳集瀟灑白鷗眠遠業嗟何就  
高明賴必傳道雖沾世用意漫逐時遷顧遇煩頻數欣  
榮頗倍千江湖萬里興爛漫百花前

寄福建杜廉訪使君

臬府羣工表言官百世公君王資稷高臺閣起黃龔吳  
越聯閩服蠻夷偃漢風九州諸道右一柱衆一作萬流中

虎豹精神肅豺狼道路通青冥行勁銳白日貫精忠斧  
繡揚秋隼泉阿達夜蛩壺冰元自潔瘴雨不勞空賤子  
嗟何幸微心誓盡躬望來方切切告別匪怱怱祇為文  
科重尤慚祖餞隆客魂消海鵠病骨瘦溪蟲謬敢辭王  
事私嘗泣老翁髮緣思母白顏每應人紅倘使彛倫薄  
其如祿養豐以茲三徑撫猶獲二天蒙上幕刑雖簡滄  
洲道未窮且將心萬疊寫入嶧陽桐

送菊

卧病高秋留海浦明日重陽更風雨杜門不出長蒼苔  
令我天涯心獨苦籬角黃花親手栽近節如何獨未開  
含芳閤采亮有以使君昨暮徵詩來凌晨試遣霜根送  
畚土雖微甚珍重極知無意競秋光往一作仕作橫窗歲  
寒供憶我初客天子都西垣植此常千株結花年年應  
吹帽始信南邦事盡殊願得封培自今日何間朱厓萬  
家室秋香端不負乾坤但嗔簫管亂儔匹歸去來兮雖  
得歸念歸正自莫輕違他日采英林下酌誰向清霜望

翠微

閩州歌

閩州土俗戶不分生子數歲學繡文圍網坐肆雜男女  
誰問小年曾識君古來夜行斯秉燭今者衢路走紛紛  
那更誅求使者急鞭箠一作笞一似雞羊羣古來閨閣佩

箴管今者女工微六軍雖復太平少征戰設有備豫將  
何云去年居作匠五千耗費府藏猶烟雲官胥培克常  
十八沉以鳩斂奪耕耘祇今棄置半不用民勞竟是誰



歡忻歲歲條章省煩費幸且不省無方殷唐虞在上儉  
且勤後王猶復錦繡焚豈有夔龍讓姚宋不言忍使憂  
心熏觀風自是使者職作歌雖遠天應聞

閑俗文繡局  
取良家子為

繡工無別尤甚亨父為闔海道知事作歌一篇  
述其弊廉訪使以上聞皆罷遣之其弊遂革

### 擣練圖

深宮佳人白日長夜感蟋蟀鳴中房起視河漢心回惶  
雲鬢籠鬆分作行清水如天收素練翠蛾帶月杵玄霜  
輓轡無繩金井悄邊頭不見梧桐黃裁縫熨帖坐在牀

載玄載黃公子裳製成不遠煩寄將但見寒暑彫三光  
身體甚適平時康君不見古來邊庭士雪壓關河征戰  
多拆盡衣裘淚如水

題李白郎官湖

當時郎官奉使出咸京仙人千里來相迎畫船吹笛弄  
綠水何意芳洲遺舊名唐祠蕪沒知何代惟有東流水  
長在黎侯獨起梁棟之

一作材

彷彿雲中昔軒蓋南飛越

鳥北飛鴻今古悠悠去住同富貴何如一杯酒愁來無

地酌西風大別山高幾千尺隔城正與祠相值青猿夜  
抱月光啼挂在東湖之石壁黎侯本在斗南家枕戈猶  
自憶烟霞祇擬將身報天子不負胷中書五車昨者相  
逢王闕下別來幾日秋瀟灑黃葉當頭亂打人門前繫  
著青驄馬君今歸去釣晴湖我亦明年辭帝都若過湖  
邊定相見為問仙人安穩無

王氏能遠樓

游莫羨天池鵬歸莫問遼東鶴人生萬事須自為跬步

江山即寥廓請君得酒勿少留為我痛酌王家能遠之  
高樓醉捧勾吳匣中劍斫斷千秋萬古愁滄溟朝旭射  
燕甸桑枝正搭虛窗面崑崙池上碧桃花舞盡東風千  
萬片千萬片落誰家願傾海水溢流霞寄謝尊前望鄉  
客底須惆悵惜天涯

錢舜舉畫馬歌

錢君畫人勝畫馬安得名驄妙天下青雲隱約見龍紋  
有意軒昂駛華夏圉官山立傾而髯朱衣黑帶高帽尖

問渠掌握詎有此牽控寧知人汝嫌君不見才士受束縛往往因之縱寥廓

杏葉黃

杏葉黃天雨霜穹窿攜日照八荒回光照見白玉堂堂中美人雙鳴璫中宵抱被直西廂忠君愛親兩不忘奈何零露沾衣裳清曉樓頭見征鴈不如謝官歸故鄉

侏儒行

君不見東方朔長九尺餘不如侏儒長三尺朝奉一囊

錢夕竟飽死復何益死者不可作饑者食有餘堂堂之  
軀天所命生之短者續則悲嗟哉世之人羨彼侏儒復  
何為

轆轤怨

門前水揚聲似雨幽人當窗碧絃語東里征夫去不歸  
一雙蛾眉鏡中舞年年井上攀轆轤勞心只恐秋葵枯  
他家種得長生草梅花落盡青青好

掘塚歌

昨日舊塚掘今朝新塚成塚前兩翁仲送舊還迎新舊  
魂未出新魂入舊魂還對新魂泣舊魂丁寧語新魂好  
地不用多子孫子孫綿綿如不絕曾孫不掘玄孫掘我  
今掘矣良可悲不知君掘又何時

望瀛海一首送危太樸之四明兼簡廉訪鄧使

君翰林袁侍講

危君英妙年獨往志千載天馬出名駒空行見風采昨  
日銜書到空谷甚欲留之不能待九月間帆指四明要

逐高秋望瀛海海上接天漫漫世人不知此別難當  
君夷猶碧嶼日是我對月永夕猿狖啼青巒江樹葉飛  
天雨霜江上吳舡思斷腸窈窕徐家兒與女却望蓬萊  
如故鄉君行却向三山望雲霧軒窗六鼇上東方雖樂  
不可以久留歸獻仙公白雲唱西過錢塘遇順風為拜  
湖南持斧翁會稽學士卧雲島朱絃流水鳴孤桐道我  
寄語莫忽忽送君有情亦如海海水有盡別意無終窮

至日行



長安夜半通明光  
羣公冠佩列鴈行  
泰壇三成樂萬舞  
布衣類得齊鳴璫  
小官需次祇自賤  
當日再拜謝日長  
多少朱門圍艷質  
何當起視東方白

奉觀許尊府遺墨

奉常許君玉色立  
手抱父書紅錦襲  
紛茫蜀令九霄神  
扶摘郢州千首濕  
鍾張雖云世已遠  
任趙未可肩相及  
樂滿天地雨聲急  
我縱覽之重於邑  
却憶風雷昨夜顛  
萬壑起盡蛟龍蟄  
不然尺素尋常耳  
何自一作蕭蕭百

靈集草堂驚怪不敢留至寶豈復能輕酬還君子孫世

善收扁舟歸弄江

一作五

湖秋

夜上烏巖

扁舟夜傍烏巖宿

一作樓

然火上巖尋古祠老巫輟睡啓

神戶牽幌請官窺漢儀漢家將軍利於鵬征行往往皆

良奇當時光武皇帝聖舉以善馭皆周知將軍再出定

窮粵忠義耿耿光精垂不然夷祀已千載何定

一作得

至

今歌舞之高縣銅鼓五獸缺以手摩拂增深悲蜈蚣宵

行蛛網結不識款書何歲時庭中蕉葉照石面猛虎出  
谷靈風吹澤魚道尋從吏扶掖欲留頗復懼深危登臨有  
客動必戒況此星露景倏遲獨立蒼茫問橫浦明日江  
山勞夢思

古杉行

丹陵觀有古杉屹如雙闕當雲門云是鍾君之手植君  
去此樹餘空邨尾搖翡翠捎八表根結蛇蛟行九原幽  
邊豈無鬼神護深處直形天地恩一方拆裂引穿溜猶

是百年燒火痕蒼皮樹裏漸欲合始知草木有道存或  
云下有丹火伏四時地底皆春溫神還復壯此其驗疑  
似自此無傳喧平生正坐嗜奇古來看適值寒冬昏長  
歌沈思遶其下夜半月高松露繁飄飄葉縣見鳥影牢  
落豐城龍劍魂何當喚起博物者共騎黃鵠凌崑崙

題皮野逸亭

方丈新亭隱叢篠下有長風蔭清沼林間白日漏遊絲  
空外青烟送飛鳥人生百歲今半之更百千歲將奚為

麻姑自是好風骨按行蓬島歸何時

張明德經歷松石圖

張君畫手天下奇往者京城曾見之濟南參議最博雅  
每為送酒題長詩深山大澤生喬松緘封寄我章江渚  
問君安得致此本吏牘正類麒麟羈又費臨川百日假  
不爾能事何能施澗阿無人白石爛飛泉但見下連漪  
老夫對此神慘惻況近歲寒霜霰垂高齋展玩意未已  
便欲共赴青雲期搔首絃歌白駒操悠悠四海將誰知

懷舊游贈別杜君還益津

往與羽人曾結滄洲期  
醉騎鯨魚躍天池  
北走幽都摩碣石  
所歷至今皆見之  
澤國波光秋潏潏  
津亭月色曉參差  
山夾疎鐘和雪度  
樓棲斷角引霜吹  
蘭園坐送流鶯亂  
華觀行聞住鶴悲  
別來幾度斜陽裏  
平曲風烟勞夢思  
安得狂心化為浪  
去隨流水到天涯  
偶向燕城逢杜子  
為我立馬歡相持  
自言家在碣石西  
石西易水清淪漪  
易州風帆日日至  
佳人何事重來遲  
重來易遲去

易遠便欲從君川路返  
歲年冉冉思無限  
詩成鴈過雲  
濤晚

小孤竹

小孤有石如虎蹲  
西望屹作長江門  
洪濤萬古就繩墨  
雖有勁勢不敢奔  
大哉禹功悉經理  
何必有志今能存  
大者為綱小者紀  
不徒百谷知王尊  
靈祠正在石壁下  
我來適值秋風昏  
明朝東行弔碣石  
更與尋河問九源

贈李山人

平生慕事華蓋君四海孤蹤隨白雲峨嵋山人住盱水  
駐馬重逢帝城裏別來相問意悠悠北走南飛又幾秋  
昔向貴溪尋講鼓又從薊郡攬征裘展圖示我青山屋  
山在盱城小江曲東風日日蕩人歸明發行歌載黃鵠  
憶昔上帝勅游華子岡中道勒回俗駕賓炎方是行倘  
或如私願華子岡頭定相見麻姑應解索題詩碧桃花  
發報人知

己未行



二年六月己未朔京城五更大地作卧者顛衣起若吹  
起者環庭眩相愕室宇無波上下搖乾坤有位東西却  
自我南來覩再震初震依微不今若昨朝展席坐堂上  
耽玩圖書靜無覺堂上羣兒又驚報方饌饗人喪杯勺  
櫛者倉惶下牀榻門屋鏗鏘振鈴鐸祇今猶自騰妖訛  
旦暮殊言共郭郭大家夜卧張穹廬小家露坐瞻星落  
焉知怪變不可屢安巢盡有一作南飛鵲昔聞上帝憂  
瀛洲親勅巨鼇十二頭特為羣臣舉首戴萬古不與水

東流豈其九州亦類此此事或誕或有由上帝甚神吾  
甚愚戴者勿動心優游

奉酬段御史登岳陽樓之作時分理盜賊至海

康

誰能手鋪湘水平剡却君山看洞庭昔人已騎黃鶴去  
樓前亂芷春蘭青豈知繡衣後千載遠違鳳闕來江城  
憑高弔古落日紫領客置酒開雲屏酒酣點筆賦新句  
薄海傳誦令人驚憶我初游白玉京與君聯步趨承明

手宣皇猷敷帝績濟濟學士如登瀛一行竟墮萬里外  
回手滄浪思濯纓守官區區事無補惟有白髮欺人生  
牂牁水外萬竹底四時鳥語烟邊鳴忽忽此地復相見  
恍如幽夢求仙靈中宵秣馬不遑暇君又北鄉予南征  
如茲後會復何日念之使我雙涕零宮中聖人總四溟  
所過海岳須澄清鐵冠峨峨望天下青霄快展皆脩程  
由來豺虎伏仁獸況有鷹隼當秋橫明夜相思隔雲島  
月落高臺聞笛聲

送蕭二十兄

東郊蕭條生事微快馬日日趁朝歸黑頭游宦吐梁肉  
青眼高人歌薜薇儂家旅食強甘苦何物俗流輕是非  
百歲乾坤消屐屨三江風浪隔庭闈柳根臘雪春猶凍  
沙上晴雲暖更飛昔擬此時具吳榜送行何故不沾衣  
奉和李監丞醉贈羽人之作

自從墮地愛名山五岳尋真去不還青山無津度日月

旦暮御風

一作氣

行其間九江西來赴海門中有道路古

來難笑談解入蛟蜃腹脫此命與松喬班吾嘗左揖三  
茅君右手直接高飛翰至今空濛偃翠蓋望雲懷我雙  
佩環君從茅山來青衣白霓裳肝膽出古劒剗裁光甚  
揚玄元皇帝雲與仍

李武昭王  
嵩之孫

稱世舉德朝未央偶吹

龍笛過九市共君斟酌北斗旁浪傳北斗不可挹酌之  
酢以白玉觴百觴未已已復醉援此織女天機章舉頭  
目送南飛鴻我自滯留君遠翔眇眇美人絳珠宮絃白  
雪兮歌清風浮萍流水相遭逢何獨不在岐路中何獨

不在岐路中相思昨夜春缸紅

元詩選初集卷二十八

欽定四庫全書

元詩選初集卷二十九

庶吉士顧嗣立編

社日

丘鄰雨止散青烟  
白叟相違已隔年  
忽遣大兒三角結  
打門來覓社神錢

五月二十六夜宿松林蘭若

白沙寨下接飛霞  
行至招提日已斜  
睡覺忽聞山寨語  
不知今夕離吾家

發湖口

已過匡廬却向西片帆猶逐暮雲迷路長正是思親節  
取次驚猿莫浪啼

潯陽

露下天高灘月明行人西指武昌城扁舟未到心先到  
卧聽潯陽譙鼓聲

以瓊扇一握奉致黃明府

拾得炎洲月一團殷勤持贈比琅玕情知已是秋風後



留作明年九夏寒

鍾陵夜宿聞鐘

中年江海夢靈皇  
夜半聞鐘似上陽  
一百八聲猶未已  
更兼雲外鴈啼霜

日晏

昨日相期早出邨  
今朝日晏未開門  
可人一夜東風雨  
綠徧天街舊草痕

院中夜直

此身只似到南州  
莎草寒雞一片秋  
後夜玉堂誰上直  
料應少睡更多愁

離揚州

孤蓬如磨遶汀沙  
葉滿平湖藕未花  
回首竹西亭漸遠  
一江烟雨酒旗斜

過三合驛

一春歸計又蹉跎  
窮粵風光奈病何  
總有青山千萬疊  
行人常少鷓鴣多

江上古祠

老樹昂藏倚岸隈  
祠靈經歲鎖蒼苔  
豚蹄卮酒能多少

便一作但有羣鴉旦暮來

湖面

湖面春深煖氣勻  
青蕪未隕

一作損

已知春沙灣散駐張

魚客葦室時驚射鴈人

北山谷中老父

無多林屋冠青山  
長子成孫鬢未斑  
問我鄉原何處是

半生江海未知還

渡端州峽

權郎得便泝清流  
忽報舟前曉霧收  
蠻語酬人翻自苦  
好山不敢問何州

正月二十四日至寶圭驛  
是北流縣自此遵陸指  
鬱林矣

遠辭京闕碧雲端  
泝盡夷江未到官  
回鴈峰南更千里  
是行誰為報平安

得樟樹鎮便寄家書

商船夜說指江西欲托音書未忍題收拾鄉心都在紙  
兩聲杜宇傍人啼

臨高阻雨

恐傾南海成秋雨急喚西風作晚涼  
淨掃黎山須見骨  
莫令楚客屢回腸

安定縣

島上青雲滅復生誰家吹笛海天明  
縣堂曉起西風急

半是深黎夜雨聲

至富屯

承恩千里出江鄉  
轉歷三關道路長  
黃葉霧開山市集  
見人鳬鴈憶橫塘

遊南臺閩粵王廟

海角釣龍人杳杳  
雲間待鴈路迢迢  
若為借得山頭石  
每到高秋坐看潮

池館夜坐聽雨

更聲隨雨動譙門頗似聽泉宿楚原客裏青燈如骨肉  
獨能相待向黃昏

懷京下親友

海上經年思殺人絕憐京國舊交親過江唯有傳相使  
寄得書回是暮春

寓書

欲寫鄉書寄故園行人已遠意空存舉頭却見南來鴈  
箇箇隨春度塞門

憶得

憶得佳人白紵詞  
幾將天外數歸期  
自從落盡庭前樹  
夜夜秋聲總不知

贈郭判官

慈烏夜夜向人啼  
幾度紗窗兔魄低  
自有平安三百字  
無因却寄大江西

卧病

朝來忽見樹藏霞  
碧草春邊徑路斜  
佳客不來春雨盡



山禽啄徧小桃花

清明日留西山

離家六度見清明  
知是何時出帝京  
今日登臨倍惆悵  
好山多似豫章城

西谷訪人不遇

出郭幽人晚未歸  
青天咫尺見何稀  
一年祇有春晴好  
多事楊花學雪飛

春日上平坡寺

蘿逕陰陰近百層金輿記是昔人登山僧苦避尋詩者  
牢閉柴門喚不應

章義門送人還南城觀臺

郊原平晚綠萋萋獨上高臺意轉迷古樹鳴蟬城下路  
送人長憶向安西

懷臨江寓居

石霜峰北淦西頭寄住林塘數畝幽比及到家猶是客  
對人強自說鄉愁

清明日

旅庖欲禁自無烟酒裏中原熟食天不分小桃紅似火  
為人兒女照鞦韆

絕句

幽人不出戶長開看盡春風長綠苔多謝有情雙燕子  
暫時飛去又飛來

題松雪圖

旁人不識歲寒松憐殺深山大雪封待得化為東海水

青天白日卧蒼龍

贈熊處士還山房

并序

廬山中有山房宋李尚書公擇藏書處今廢矣海  
昏李氏為其先作書堂於建昌州亦曰山房并祀  
尚書焉蓋有慕廬山者矣聞熊修業是間故作此  
寄之

尚書舊隱在匡廬亂後傳聞宅已墟祠宇祇今誰薦鞠  
鬼神猶自護遺書石泉宛宛輸池細川樹茫茫映日疎

不識海昏熊處士冥棲消息近何如

送馬掾遷湖南

聞君暫與故交違去逐西風落葉飛  
看劍未成今夕會拏舟定復幾時歸  
雲開帝子黃陵廟月過將軍赤壁磯  
事業還須各努力收名即用繡為衣

贈李宣使

故園雲卧四三年府署依然念子賢  
莫為馳驅傷遠道但將忠孝感皇天  
湖南政譽聞爭薦日下絲綸佇近傳

為報津頭黃菊藥明當照我上江船

四月十六日詣東華門奉迎香輿

天香曉報出宮城已辨隅頭合樂迎黃鳥低斜衝隊過  
紫騮踈蕩著班行百王盛祀無遺典萬乘深居有至情

失喜快

一作共

傳湯沐賜禮官識姓未知名

至夏莊懷平坡舊遊

平坡谷前桃花年時著屐到君家祇今可買惟邨酒  
無復能來試石茶簾幙高高通紫燕溪流款款伏青蛇

同遊昨有虞公子却為盧郎得浪誇

送梁知事之婺州

皓月青雲若箇還送行恨不共吳船新官浙下皆名郡  
舊宅山東有賜田禮樂固應張盛代簿書勿用歎流年  
經時不見曹員外今日因君重惘然

追和盧修撰張平章園亭觀花飲

白藕花邊香已秋西郊風物野亭幽未須短杖扶持病  
且遣孤尊斷送愁紫氣近連飛鳳闕青山遙隔釣魚舟

勝遊縱在招要外猶解因詩頌醉侯

秋日集詠奉和潘李二使君浦編脩諸公八首

古薊城邊白露零秋聲不任旅人聽  
差差乳燕朝辭舍  
嘒嘒高鴻暮過庭以病酬閒翻自惡  
將愁抵醉祇難醒  
何人解擬匡廬賦千仞岡頭瀑瀉瓚

生也無涯死有涯拋書幾擬問南華  
要知立志非多事  
但使成言自一家寒樹接天霜映鵑  
濕蕪滿地雨生蛙  
相過倘遂攜尊酒檢按牆東野菊花



迴無江左管夷吾誰復能稱晉宋書運本關天聊爾耳  
力能蓋世復奚歟百年草草雲龍地四海悠悠法象廬  
曾向鍾山酌芳草至今心死及菑畬

流落移家白帝都低頭媿盡馬相如題橋一字終何益

一作補

賈賦千金竟或無風月長留前輩詠塵沙滿載古

人書此身泛寄空江上已異當時舊鬢鬚

潘公牆角樹連庭曾是笙簧晝夜聽門巷祇今埋糞壤  
輪蹄自昔走雷霆長因午睡思茶竈却為朝吟款竹局

若續濟南名士錄莫令憔悴鵲湖亭

李侯高朗若空晴議論詩書滿腹撐期接仙舟應少便  
偶分宮硯亦多情蠻荒異俗中年歷河漢頻秋向夕傾  
此去暫煩南郡守旗旄勿用野人驚

浦君高價本璠璣多幸薰葭得所於學道初輕千里驥  
收功直到九州魚詩探飯顆尤難測賦擬蘭陵定不虛  
日日西垣更夜直還應共我惜居諸

秋入江山錦繡開白雲紅葉盡詩才句成底用三年得

槎在應須八月回自是每為浮客累非關不受故人催  
憑將寄語詞林老風雨重陽又近來

送白无咎太守之郡

瀟灑中書舊省郎排雲曾攬舜衣裳一麾況復守名郡  
萬事不如歸故鄉馬首漸違燕闕雨鴈聲欲度晉城霜  
漢廷擇相皆良吏蚤奉潘輿謁建章

奉同陳應奉訪友人不遇

翰林小暇出西城京國餘秋晚更明鷗度折磯心已熟

馬逢危石眼偏生疾風稍定樓臺色微照猶含鼓角聲  
會合何因得惆悵潛夫祇媿未潛名

寄別倪大同

知君久住玉真壇日與飛仙弄紫環從此便令行地縮  
逢誰不說上天難鶴邊紅日浮觴送馬首青山抱檄看  
相好何因不相別寄詩應到暮雲端

將赴雷陽送羅提舉之任廣東

松滋暫泊蘄門船復指番陽

一作馬

路幾千茉莉香深和

酒露枕榔葉暗煮鹽烟齊人舊算無遺策漢史新藏有  
賸錢莫為遐荒心力急珠一作朱崖更在海南邊

休日出郊

歇馬高林烟霧開感今懷古獨登臺遷臣逐客皆前輩  
幕長郎官盡上才放浪已聞窮九域飛騰終合近三台  
謝公自有青雲屐且與從容步紫苔

寄友人

繡衣行部直南州幕府英名蚤歲收如此一臺兼二妙

令人萬里破千愁  
枕榔葉暗潮聲暮  
薜荔花懸岳影秋  
此去三湘寧久住  
近天須應壘書求

題黃隱君秋江釣月圖

舊識先生隱者流  
偶因圖畫想滄洲  
斷雲滿路碧窗晚  
明月何年青嶂秋  
世故風塵雙短屐  
生涯天地一扁舟  
何由白石空磯畔  
招得人間萬戶侯

寄上甘肅吳右丞

塞上孤鷹白雪毛  
塞門風物靜蕭條  
黃河西去從天下

秦華東來拔地高  
枸杞莫將如薏苡  
醍醐足飲勝葡萄  
遙瞻圭袞還朝日  
正屬江湖心緒勞

九月十九日京東門與董右軍諸公別至通州還

寄在京朋遊

一作舊

臨分強顏作笑言  
上馬慟哭投烟邨  
十年總仗舊交力

萬里獨懷明主恩  
南極下頭星象少  
東風近便處

一作柳

梅繁時人祇怪丹砂令

一作冷

曾以虛名細討論

山齋

山齋朝雨竹光勻  
茶竈催添石火新  
對語黃鸝真不俗  
飛來白鷺淨無鄰  
辭榮豈敢要時論  
賞靜猶應愧古人  
報道林河春漲起  
少須重理舊絲綸

傳之經歷謁告還  
湘中未語別而宵  
征翌日與僚友追  
送生居亭中二首

美人歸思落滄波  
昨者論心肯重過  
寒盡極知春意在  
夜深無奈月明何  
海隅雖暫違霜幕  
天上應須接玉珂  
如此才賢移病去  
瘴煙端的為誰多



北風盡日破南溟行路經年倚壽星  
子自全家依翠岳  
我猶萬里隔青冥  
山田鹿下投書去  
水館猿啼却坐聽  
王事馳驅知有素  
何由重見此郵亭

十月九日詣天光門上進三朝實錄

儀鑾簇仗滿雲端  
玉鑰初開衆樂攢  
三后龍光周典冊  
羣臣鵠立漢衣冠  
爐香著日浮晴靄  
宮樹斑霜試曉寒  
千騎前頭都不避  
一作見  
祇傳學士拜金鑾

歸來

十載歸來問草堂，入門喜見葛山蒼。  
慈親已慰占烏鵲，稚子行堪詠鳳凰。  
新理園池幾初物，小移松柏且分行。  
卜居未是居難卜，為恐旁人議一作笑楚狂。

辛酉歲元日

延祐七年三月英宗即位是歲改至治元年

西山千仞鬱崔嵬，山下樓臺紫翠開。  
玉帛會同來萬國，璣衡懸運屬三台。  
嘗聞海客談金鼎，更見祠官進玉杯。  
慚愧詞臣今白首，久無賦頌獻蓬萊。

曾教授赴韶州

荔子紅邊五月初廣文去住定何如報恩豈戀將軍馬  
治盜聊迂太守車多近藤蘿安吏舍少憑椒葛附音書  
到官定有佳聲薦瘴雨蠻煙細被除

靖海縣

海縣春深沙氣暄居人生事不離邨上梯取斧料桑尾  
抽櫂移舟繫柳根已過清明違帝里不妨紅白徧江園  
持盃試與酬風物深媿樊遲學圃言

百丈春日紀懷

東風久不到新堂生意雖微未  
卒荒草上葫蔓偏挺特  
花間蘆葦故高長時來豈盡栽培力  
物化須知長養方  
葵藿有心終莫奪每聞支笏照滄浪

寄題集賢周司直悠然閣

番陽東下萬山圍魁閣崢嶸面翠微  
雲接大荒迴古色  
波涵落木動晴暉宦情靜與遊魚逝  
詩思長隨夕鳥飛  
久待倚闌成獨酌癡兒了事各須歸

歸思

陶公歸思定如何山郭春風長薜蘿直道當官惟任拙  
庸才負祿祇慚多江山實自辭家隔日月虛隨閉戶過  
點點飛鴻向天末憂端不類澤中歌

風止聞鵲

荒山遠水放輕舸頓雨顛風戒敝袍五六月餘鄉間絕  
二千里外客心勞樹間鳥鵲聲頻好天上麒麟格自高  
獨有武夷看未了野人寄語壓香醪

奉和王繼學懷濟南舊遊四首

前輩風流逐斷澌  
濟南舊錄故人詩  
遙知靈運初游日  
正是元方後載時  
青社寥寥成異物  
丹丘晶晶屬遐思  
壯年易動離居感  
繾綣花前金屈卮

樓上看山翠黛浮  
樓前沽酒錦纏頭  
登臨試與詢湖鴈  
豪傑親曾侶海鷗  
沙嶺曉晴雲散出  
野亭春盡水交流  
意中故舊那能得  
強擬偷生賦遠遊

每愁大手不如燕  
多見公侯勝昔年  
計拙欲求千戶等  
心勞正類十洲仙  
幾回見月思歸去  
暫到臨風復惘然

剪盡綠楊三萬樹多因無處著啼鴉

手接新詞絕底清一雙白眼為君青  
寰區正待新年穀  
江漢徒傳赤日萍斷雨潛蛟虛水榭  
遠波迎鷺實雲汀  
此情可在齊州外不解無人問獨醒

上真應寺觀寺後龍湫湫在厓上蓋由寺北下馬  
並高數十折得之又數步許得巨石有僧龕其中  
云即唐盧叟所隱成道處時日斜方焚香誦經聞  
客至乃輟誦相迎作茶云

憑高窺窕辨精藍濯佩還思訪古潭字扁孟家題處碣  
洞留盧叟去時龕近人野鳥如曾識問客山精不敢談  
聞說平坡猶在上登臨雖倦且停驂  
德機本集至元間臨川葛仲穆所編  
以下又從清江楊翬刻本  
及諸家選本所見錄人

節婦王氏

妾年四二三始識月團圓十二學女工刺繡如鴛鴦十  
九嫁夫家事姑施衿鞶夫婿良家兒世籍為王官雖聯  
朱紫貴不習綺與紈過庭執詩禮開口若驚湍風儀在



一時爭作玉人看  
天地忽降毒摧折青琅玕回首四  
十春景光若流丸貞心守松柏芳性  
軼芝蘭落月簾  
帷曙西風機杼寒沈思往昔事淚下紅闌干豪客至  
茅屋舉家竄林巒入房衛病姑身死白刃攢相向義憐  
釋視死色無難親知為歎息保社為辛酸欲與上州府  
為妾旌門闌妾實無所願所願在所安婦人往從人阿  
母涕汎瀾送行遺之語敬順無違歡匹偶固有時寧知  
憂患端辛苦蹈物變豈羨身獨完殷勤謝舊故聞者摧

肺肝

重五日至西峽渡邂逅閩帥王侯盛稱山川之壯  
余謂可以為知矣亦復有賦渡近方山之下

繫馬西峽間朝曦射厓赤城中見方山江上成亂石綠  
流感重險攬勢得鉅敵不有歌詠懷徒困馳驟役因之  
竊歆欵美哉此歎息尊醕清屢注盤荔朱新摘紛庵異  
方俗卓犖同門客去去無久留薰風蕩南國

袁州謁韓祠已宜春臺晚眺

乘月泛修渚凌晨訪崇臺曾覺匝地起疊觀凌雲開時  
須炎夏首斗柄從南迴四周翠巘出六合清風來玉明  
猶日月憲令若風雷惠澤綠郊樹陳蹤蒼澗苔鼓鐘代  
寂寞輪軫路徘徊聞茲守郡者自昔何雄哉百鳥見孤  
鳳衆星麗三台吏負鈞石寄法已毫分該云胡蒼臨眺  
遠揖謝英才

樂會縣

早發端趙邨暮投樂會縣縣阻道路長但見水蔥蒨輕

風掠溪縻好月觸石面前行日已分後從氣猶眩役者  
向我言前年土豪變黃旗伐畫鼓樵屋擬牙殿居民絕  
烟爨搬併入淮甸却又遭劫殺流動靡安奠羣夷盡蜂  
起盡用血洗箭公然肆淳暴請與官軍戰官軍幸努力  
摧落得深便雖獲覆其巢姦愚不勝譴于今郊原間芳  
草白骨徧我行適夜分聽此毛髮旋前岡明炬火叫應  
欣蹂踐官吏候我來始與人相見沿河島汴深問路山  
田轉啾啾烏鳥鳴靡靡鞍馬倦一從違京國幾度夢霜

霰何所非異鄉開懷謝身健

奉寄翰林鄧侍講

曩承持節江之東騎驢再上蓬萊宮蓬萊仙人歌白鶴  
聲落五湖烟雨中世間爵祿不易致何獨去就如飄風  
朝廷禮樂須制作六經隱義資發蒙論思廟堂集耆碩  
啓沃寧讓前諸公閉門讀書古都市四輩冠蓋方隆隆  
我生生長在窮谷那有文字爭人雄謬蒙引譽百僚上  
負祿府署慚無功一別十年還又五昔者少壯今成翁

誰知復客七閩下隔二千里來詩筒羸軀頓醒瘴厲惡  
賴以慰此心忡忡粵王城南浪自白粵王城西花正紅

凌雲篇

往與凌雲山人披虎豹謁太清是時東風滿瑤京綠楊  
三月聽流鶯君隨挂席湘江行予亦騎馬趨承明手把  
宮袍厭縛身却憶南溟有縱鱗四年辭海岳一舉上星  
辰逢君却向凌雲下心上經綸甚瀟灑半夜清猿四合  
啼長松古月照回溪桃花源上路一去意都迷我本凌

雲峰畔客何日相從卜其宅早服還丹生羽翼共脫朝  
衣挂青壁

萬竹亭

誰能買山種萬竹殘年請老住巴蜀結亭更在竹中間  
四面雲溪寫山麓風敲最覺夜眠清雨洗勝延秋望綠  
日吟不限三千字日飲定須過百斛隴西仙翁持斧客  
散馬涼城行新菊為言令弟隱滄江如此風流天下獨  
乃家正在蠶茨野東東琅玕繞茅屋方知白眼待時人

箕踞科頭自為俗是邦子雲劇博雅閉門草玄食漢祿  
多緣未識此君心往事微瑕傷白玉使君自是廊廟具  
方駕前修詎為辱平生抱負勁直節日暮天寒照空谷  
始我瞻望望不及終我歎嗟嗟不足乞官倘或從西遊  
向子亭邊祝黃鵠

贈別清夫還吳

新雨不作泥鉤輶樹上啼征夫懷遠路家在太湖西別  
家今幾度楊柳江邊樹念鄉車輪下漸是中年路萬事



中年尚可期人生且莫長別離長別離向何方九江落  
花清浦香王睢斑斑鳬乳黃南望不見三高堂奈何游  
子思故鄉我家諸公濟時早功成身退合天道當時未  
必知者賢挽不迴之卧烟島後來閱盡虧成事始識從  
之去時好我不能赤手縛虹霓又不能委身同草木生  
逢堯舜世肯受泥塗辱昨者誤奮龍門雷螭涎嘲之自  
云足憂來舉觴酬白日唯有皇天照空谷張公子吳江  
生我有千載意不羨身後名為君寫作贈行曲曲中鏗

憂難為明君行不聽我意平明日買船棹秋聲亦欲東  
下窺蓬瀛飄然此去白玉京須卿禹穴來相迎相迎未  
見須相待客行雖遲心未改

即事

隨地居能勝因人景倍饒折花疏菡菹移雨近芭蕉放  
浪明高蹈留連近久要虛心待世慮已任過雲飄

蕪李會合圖

未識沙場苦空曾奉使來詎知羶乳約不抵鴈書迴漢

節風霜古胡笳旦暮哀誰憐太史令心為故人摧

六月初十夜雨止玩月有感

雨歇青林迴虛齋生夕涼簾帷方度月枕簟已懷霜地  
角家何在雲端路轉長慈幃近安否歸覲不能忘

王武子相馬圖

偶然來廐吏喚作九方皋毀譽依名立周旋逐物勞神  
馳風電足眼冷雪霜毛事有遭逢者騏驎固自高

八月十五夜

城上初聞柝天邊獨倚樓可憐今夜月還照異鄉秋燭  
暗頻移席簾虛不上鉤回文錦機字寫得大刀頭

風雨

風雨忽如此空山方晝眠故應為計拙可復要人憐燈  
火鄉邨路桑麻杜曲田悠悠今視昔把卷一茫然

贈別南劔李使君三十韻

北戶羣山表南雲九域西君今行欲徧此意別都迷妙  
句人誰識前年手自題

李以烏撒宣慰同知改吏部  
侍郎使交趾有南征詩一律絕

峩鉤象譯懸徑摘烏栖炎奧通冠冕邊陲重壁主禮新  
尊璽節名故籍金閨勞有恩言切歸無寵數躋宸心端  
外見廟誼肯中稽望譽騰青瑣輝光拂紫泥旌麾深假  
借民社載扶攜猛氣排蒼鵠幽思啓碧雞動應多愜會  
行豈強扳提皂蓋喧童穉黃堂拜耄倪天機馴虎兕帝  
力及鳬鷺越厲冬深少閩烟晚向淒野人封水竹郡吏  
接山谿汶碧荷香弱坡紅木實齊九秋鵬鷺翮萬里驢  
驢蹄導從羅弓矢登臨按鼓輦少須青玉案與報白銅

韞忠信先蠻貊文章協璧奎孰云當近服不遂慰蒸黎  
執手關河早論交歲月睽物華盈眼亂春色傍人低謝  
豹空洲隱王鳩遠樹啼國容方整整旅病轉悽悽謬忝  
詞垣密微能官秩卑從班窺遂霸浪漫笑山嵇何日同  
尊酒因風獨杖藜延平寶劍氣旦旦候虹霓

寄甄氏訪山亭二十二韻

問子亭何許潯沱舊水頭谷陵千載異風物四時幽城  
郭長無事琴尊或此游窗攄平野秀戶接亂泉流猿鳥

相賓送漁樵互獻酬太行晴日近碣石晚烟稠莽莽青  
天外離離碧海取都將神迹化只可笑談求大檻花周  
映虛階藥競抽豈容黃壤汙祇為白雲留更就諸峰老  
寧須萬戶侯心知嗜好酷勢肯去來休予亦尋山者人  
疑避世儔偶然依紫閣不是謝丹丘薄與江湖遠頻嗟  
歲月周夢嘗經五嶽思屢繞三洲室宇憑誰寄園林誓  
自收把書消旦暮種藥引春秋地僻澄官冗天空掃旅  
愁幾時攜古劍萬里覓扁舟賸想高人趣空懷賤子羞

猶勝徐市俗瀛島計悠悠

曉山謠贈別金陵陳處士

昔我望天岳于時春正深雞鳴九州陌鶴警萬花林  
旭日騰重海宵霞映別岑露條承嶸嶸雪澗瀉欽峯馬足  
無由定鴛聲不可尋畏鐘牽逸覽挂笏繫虛襟每想丘  
中趣如懸空外音十秋傷逝水千壑記捫參晚遇陳夫  
子高談契夙心天形疏造化月眼識浮沈宦路悲懷玉  
君門惜和琴豈因平旦氣薄示暮年歲但恐丹崖失何



愁素髮侵會當期絕巘與爾鍊黃金

贈裴秀才

江邊見立春花老問征人物色隨鄉異風光逐候新朝  
廷方貴士經術足謀身舉世皆騰踏如君獨隱淪鳴山  
應鶯鶯在野決麒麟已用遺經試寧辭累牘陳飄飄行  
李別繾綣酒杯頻四海多英俊諸公自等倫雲霄開大  
道溟漲接通津百嚙倉庾近雙飛蛺蝶勻款留俱蘊藉  
歸到莫遂巡肯薄傳家賦猶堪博釣綸

贈別鄧修撰歸杭州

東風二月禁門闕天上佳人有遠行惜路頻瞻霞上日  
望家直到海邊城休須滿假辭三徑定約重來賦二京  
回首津亭萬家柳初非憔悴獨關情

謝冷架閣春日東麓見懷

空谷白駒消息遲東風楊柳萬烟絲珮環憶為同心贈  
書榜傳看俊手施曾以陋居追往昔却因嘉遯感今茲  
相思恐涉山靈怪不遇仙人不記詩

送別周儀之推官赴錢塘并簡李四祕書

武帝龍飛第一春  
京華相送各沾巾  
詎知邂逅文身地  
總是棲遲皓首人  
山驛蛟眠星滿洞  
水鄉鴈起月迷津  
若逢李洞南天竺  
為說前書感謝頻

送李祕書洞

祕書出自蓬萊苑  
流落東吳又一春  
見月定懷騎鶴侶  
聞秋肯讓鱸膾人  
吾曹事業徒溫飽  
子等居諸異隱淪  
海表何由攜手再  
相憐同是老詞臣

寄題龔氏山園

居士名園何處求，無有是中風物幽。  
巖花故解分藤綴，澗水新能合竹流。  
綠幙黃簾圍玉樹，青天白日暎朱樓。  
醉吟自爾人難識，況是心輕萬戶侯。

五月二十日發雷州過徐文次驛候役者不至留  
二日

久約歸吳弄釣舟，海天羈思復悠悠。  
誰知樹底春生月，獨坐人間地盡頭。  
粉壁舊題分蘚讀，瓦罍新酒接花筍。

邊鴻固是南來絕絕為雷城信滯留

送元經厯赴廣東

番禺直北望長沙元帥持戈鎮海涯  
萬里送君歸幕府幾時為我寄梅花  
雲蒸巨浪魚吹岸柳壓荒山獠陣牙  
欲托鄉書妨枉騎渚湘西上是吾家

壽宮

武帝初行祀竈方祠官宮女儼分行  
石欄井井通金殿金蓋童童出畫牆  
但見擾龍呼作相未聞騎鶴拜為郎

祇今松柏緣原廟時接雲輶下太荒

贈陳提舉

便令回首綰青銀已負南宮第一人  
文武既興殷士貢申轅猶比漢儒真  
離鴻苦事風霜急伏驥深心道路親  
若遇清溪尋舊隱洗觴猶及艾陵春

和謝伯雨見惠之作

騷靈

一作靈

逝矣不堪呼幾欲南遊訊楚巫  
城郭烟濤垂

白帝星河風露浥黃姑幽人往恨九關豹  
佳士今猶千

里駒久客資君

一作政資

相慰藉可能無意謝飛鳬

蓮房

憶得花神一笑歡六郎家住小江干佳人怨等秋風近  
穉子眠聽浦雨寒強為折來開戶牖誰將鎔出擬杯盤  
少年太守思兄弟戢戢青頭莫漫看

畫馬

一自房皇下渥洼龍媒多在玉皇家赤毛灑血微生汗  
黑暈團雲整作花不待老能知失道固應來是涉流沙

如今豈少真神駿猶有丹青紙上誇

獨立

能詩不得靜中師又是天涯獨立時  
高閣夕陽人影亂曲河新水棹聲遲  
一身慷慨家仍遠十口淒涼歲薦饑  
偶爾憑闌感風物臨流先被白鷗知

草堂

草堂不在萬山峰時有幽人步往蹤  
雨壓牆烟籠薜荔石行渠水鑑芙蓉  
清名豈讓陶貞白共住猶強陸士龍



忽憶鴈行天外去歸來期在粵城中

雨後坐郝大參亭子

每見人來問草堂偶從燕坐憶滄浪地形遠競朝霞與  
林氣清分宿雨香移石旋成行藥徑障泉思引釣魚航  
他年紫綬歸黃閣几杖苔生儘不妨

公堂暇日

新起危樓接大荒海天奇觀壓殊方周牆恨未高千尺  
猶見他家竹短長

將如靖安徐文學自新擘舟來候良有古意以詩

留別

西風危棹逼青雲稍下臨江細路分  
問縣尚須窮日到  
棹歌無計得留君

懷京城諸公書涯州驛四首

甚憶清河元侍講  
送行猶有玉堂詩  
只今夜夜隴頭月  
照見征人有所思

復憶濟南張吏部  
作詩文氣壓諸公  
佳兒亦是門生輩

尚想他年似若翁

繡衣御史果能文蜀道新來有李君  
記得京城黃菊爛  
為余來覓董將軍

妙為文字吾雄甲精切于今孰與儔  
說著奉常虞博士  
恨渠猶不見崖州

縣下鑿池種樹成聚晨起視水深五寸而草樹承  
夜雨後蒼翠鬱然可愛戲題廳柱

檳榔池上芭蕉雨更種垂楊十六株  
中有玉堂蕭散吏

檢書正對輞川圖

至烏石邸舍二首

不見居人只見邨  
離家茅屋又黃昏  
面前滄海來無際  
聞說占城對縣門

苦竹叢西石色烏  
來時依舊驛亭孤  
自從歷徧崖州路  
不敢彎弓射鷓鴣

福州雜詩三首

前日題詩自候官  
計程今日到雲端  
家人定得平安字

最念癡兒不解看

海隅霜熟螭房肥獅子橋東望翠微  
安得建陽一斗酒  
少隨甘旨到柴扉

虎豹幾曾驚石鼓魚龍獨解隱金沙  
遮藏翠荔餘千剎  
掩映朱霞倚萬家

至海口

曾隨仙仗集靈臺流落于今豈不材  
但比麻姑休狡獪  
兩行持節過蓬萊

上元日

蓬萊宮闕峙青天後內看燈記往年誰念東籬山下路  
再逢春月向人圓

二月二十四日自瓊州出白沙驛阻風二日不得  
渡海是日有幕客送寒衣却出賦詩

盲風怪雨一時清又阻扁舟兩日程天意似將留客住  
明朝浮海看清明

鬱林次韻寄懷王天輔知事

乍喜連山瘴霧收，黛眉更自鎖鄉愁。  
自從行李違滄海，九日初逢第二州。

齋居即事用教徵君韻二首

故人不見意何如，流水孤邨處士廬。  
猶記去年霜橘熟，分甘曾得寄來書。

桑溪竹圃路團團，門巷都非少日看。  
送客棹船頻借問，向來江面是闌干。

趙僉憲舊居

閒門付與東風埽獨客殘春思遠道日午不見蝴蝶飛  
細看兒童弄芳草

春日次韻友生絕句二首

馬頰河陽近北辰去來猶爾恨通津陌頭總是春風樹  
自笑楊花只戀人

旅食京華日欲晡家園迢遞隔天隅妻孥預識羈懷苦  
解事新來一字無

西軒即事




行厨晚食坐蕭條  
欲買鱗魚待早潮  
鼓絕山城門未掩  
夢和疎雨度西橋

春日西郊

東風千里福州城  
綠水青山老送迎  
惟有垂楊偏待客  
數株殘雨帶流鶯

聞角

西風嫋嫋拂弓旌  
千里來聽曉角聲  
縱復淒涼歸未忍  
炎州此外更無城



元詩選初集卷二十九